


春秋十義 一之五




漢書門				
二	九	六	八	二
册	架	函	號	類

庫	文	閣	內
三	八		漢
五	四		書
函	二		
五	二		
册	架	函	類

春秋

內閣文庫	
番號	漢 8422
冊數	2 (1)
函號	275 59



禦兒顧自公著

春秋本義

思善堂藏板

春秋本義目錄

卷一

隱公

卷二

桓公


卷三

莊公

卷四

春秋本義

目錄



淺草文庫

樂兒顧朱著

閔公

僖公

卷五

文公

卷六

宣公

卷七

成公

卷八

襄公

卷九

昭公

卷十

定公

哀公

春秋左傳卷一
也則令春事謂之春一陰方長成之始也則令秋
事謂之秋凡周之令皆豫令也其制自與商秦異
也公何以不書卽位曰託攝焉以立而不行卽位
之禮也君之始不自正其位而曰吾且將以授人
是二君于國也召公子翬之謀而誨鍾巫之亂也
三月公及邾儀父盟于蔑邾公並作邾婁
蔑公穀並作昧
字邾附庸也不能自達于天子以附于大國以脩
貢職曰附庸率以上忠也撫以下信也公以盟爲
政政可知矣曰公及邾儀父志不敵也

夏五月鄭伯克段于鄆

不曰弟是兩絕也弟謀弑兄兄亦謀殺弟故曰克
若曰惡乎其爲兄弟兩敵焉而已矣何書乎鄭伯
君也臣奉義義可滅親也君制義義不可滅親也
臣曰誅之君曰放之禮也何書乎于鄆以其地爲
可放也負于京則討之尊尊焉也窮于鄆則放之
親親焉也

秋七月天王使宰咺來歸惠公仲子之賵

天王曰來錫諸侯曰來歸曰天王曰來歸不當歸



也下替之辭也

九月及宋人盟于宿

冬十有二月祭伯來

公子益師卒

卿之任重矣其美惡繫于國卒之者重之也或曰或不日者何其書日者大美惡也大美者若曰此日而後無此美矣大惡者若曰此日而後蔑此惡矣卒而不書日其美惡皆非甚焉者也語曰蓋棺而事定此書卒之旨也

二年春公會戎于潛

夏五月莒人入向

無駭帥師入極駭穀作倭後同

秋八月庚辰公及戎盟于唐

九月紀裂繻來逆女裂繻公穀胡並作履綸

冬十月伯姬歸于紀

名以外交也女繫乎父婦繫乎夫無外交故無異名也古者男有男子之序女有女子之序各以其序也故曰伯姬也不曰歸伯姬于紀父母則無為

也父母不以女事人卒乎女之事焉而已矣且不
以父母之事臨其夫也

紀子帛莒子盟于密

帛公穀胡並作伯

十有二月乙卯夫人子氏薨

鄭人伐衛

三年春王二月己巳日有食之

二月何以亦言王曰言乎月則正言乎歲則春皆
王政之始人事之肇也日有食之者何曰日不自
食也而有食之者去其食之者則日復故聖人貴

救慝也

三月庚戌天王崩

夏四月辛卯君氏卒

君公穀胡並作尹

秋武氏子來求賻

武氏子來有求於諸侯也必倚王命焉君子不書
王使正其實也曰居喪不言聽於冢宰此冢宰之
使也冢宰可以攝天子之政不可以攝天子之稱
故曰正其實也武氏子者何曰非天子之行人也
使惟子弟私人焉也若天子之行人則必有爵與

字矣來求者何曰非職貢也貨財曰賻諸侯有會葬之禮當責其禮不當責其財也惟朋友有賻可也

八月庚辰宋公和卒

先王以國與子子之中嫡庶長幼有定序焉以坊亂也君有定位則民志不貳否則得位者恒忌失位者恒怨百官疑謀分黨以爲利圖亂無日矣宋宣公舍子而立其弟穆公又舍子而立其姪卒之子馮出奔殤公見弒貽謀之不善也吳僚之死兆

於諸樊詭勝之謀啓於竇后善乎趙普之對宋太宗曰太祖已誤陛下豈容再誤此老成經國之言而或者非之過矣德昭廷美皆太祖死之也幸而不亂亡也

冬十有二月齊侯鄭伯盟于石門

癸未葬宋穆公

穆公穀作繆

四年春王二月莒人伐杞取牟婁

戊申衛州吁弒其君完

州穀作祝後同

夏公及宋公遇于清

宋公陳侯蔡人衛人伐鄭

秋翬帥師會宋公陳侯蔡人衛人伐鄭

九月衛人殺州吁于濮

冬十有二月衛人立晉

殺州吁曰衛人衆也衆所欲誅而討賊老夫何勛
之有焉立晉曰衛人衆也衆所欲迎而有君老夫
何恩之有焉討賊而不居定國而不豫知石碯之
爲純臣也

五年春公矢魚于棠

矢公穀胡並作觀

夏四月葬衛桓公

秋衛師入郕

郕公作盛

入焉者無禦焉也天子之禦在四夷諸侯之禦在
四竟洞洞然由敵之來也可謂國無人矣詩曰
赳武夫公侯干城言有人也

九月考仲子之宮初獻六羽

邾人鄭人伐宋

螟

冬十有二月辛巳公子彊卒

宋人伐鄭圍長葛

六年春鄭人來渝平

渝公穀胡並作輸

夏五月辛酉公會齊侯盟于艾

秋七月

何以必舉乎四時也曰重人事也天時所以命人事也時異則事起遇一時必思一時之事焉也

冬宋人取長葛

七年春王三月叔姬歸于紀

滕侯卒

卒有不名何也曰赴則知名不赴不知名也然則

何以猶卒之曰彼雖不赴我則致弔也有宗族焉

有甥舅焉有隣好焉彼雖不赴我則致弔禮也詩

曰莫往莫來悠悠我思言莫肯爲之先施也

有弔生有弔死此弔生也與死者無交故不知名

夏城中丘

齊侯使其弟年來聘

稱弟何也曰不以官也禮小聘使大夫大聘使卿官守之事也稱官則掩親稱親則掩官齊侯之通

其弟於列國也以親命不以官命是以昆弟掩君臣也非禮也

秋公伐邾

冬天王使凡伯來聘戎伐凡伯于楚丘以歸何以曰伐曰以其衆出也何以曰于楚丘曰以其衆出伺之于境外也以其衆出伺之于境外凡伯不能違其難而遂曰以歸深其辱天子之命也先王教使臣之詩曰駉駉征夫每懷靡及慮諸已者深也曰載馳載驅周爰咨諏謀諸人者博也慮諸

已者深謀諸人者博庶幾其不辱天子之命也

八年春宋公衛侯遇于垂

三月鄭伯使宛來歸祊庚寅我入祊祊公穀作邠

夏六月己亥蔡侯考父卒

辛亥宿男卒

秋七月庚午宋公齊侯衛侯盟于瓦屋

八月葬蔡宣公

九月辛卯公及莒人盟于浮來浮公穀作包

螟

冬十有二月無駭卒

九年春天王使南季來聘

三月癸酉大雨震電庚辰大雨雪

挾卒 公穀作俠

無駭與挾之卒也不官不日何也曰君之任臣錄

錄也臣之佐君亦錄錄也君子是以知隱公之孤

立於朝也

夏城郎

秋七月

冬公會齊侯于防

十年春王二月公會齊侯鄭伯于中丘

夏翬帥師會齊人鄭人伐宋

六月壬戌公敗宋師于菅辛未取郟辛巳取防

取邑何以再日曰無厭也

秋宋人衛人入鄭宋人蔡人衛人伐戴鄭伯伐取之

冬十月壬午齊人鄭人入郕

十有一年春滕侯薛侯來朝

諸侯不旅見曰旅見則相約而來朝也連齊結鄭

以伐宋而滕薛畏之故相約而來朝也然猝起鍾
巫之旤何也單于欵塞而王莽篡漢蜀吳歸命而
賈后亂晉故聖人治近以及遠也

夏公會鄭伯于時來

夏下公穀有五月
時來公作祁黎

秋七月壬午公及齊侯鄭伯入許

冬十有一月壬辰公薨

君被弒以死則死不得其所矣故不書地然則是
君也謂何如君也哉賊在則臣子不得備其禮以
會葬也故不書葬然則是臣若子也謂何如臣子

也哉故曰春秋之道如天天運其自然者也而萬
物資焉春秋書其自然者也而百行彰焉

春秋本義卷一

春秋本義卷之二

樂兒顧朱著

桓公

元年春王正月公即位

或曰桓宣之即位也惡矣何以不削之乎曰夫子於桓宣先君也何以言削之乎君子於先君有諱之無削之也然則有不書即位者何曰隱託攝者也莊閔僖繼變者也皆有故而不自行其即位之禮故不曰公即位也然則桓宣有故矣曰桓宣不

以爲故者也自謂當立而承先君之後於隱公子赤之變也若不變以自行其卽位之禮故曰公卽位也無義乎曰義存乎其中矣穀梁子所謂無恩於先君而與聞乎弑之實也曰春秋天子之事也或者斥其先君以示後世曰自逆以教人吾未之聞也由此說也則將有竊聖賢之名而肆悖亂之行者矣故知不書卽位非夫子削之也

三月公會鄭伯于垂鄭伯以璧假許田

夏四月丁未公及鄭伯盟于越

秋大水

冬十月

二年春王正月戊申宋督弑其君與夷及其大夫孔父

或曰及其大夫云者予之乎曰相以輔君者也輔之使被弑以死身雖殉焉何足以言予也夫亦言其任之專而倚之孤也君者羣也倚一人焉以爲君其君也可知矣詩曰予有疏附予有先後予有奔奏予有禦侮言左右中外皆有人焉也宋殤公

春秋本義 卷二 二十
之立也屬於孔父孔父殺而殤公弑矣非特殤公
然也管仲卒而齊亂王猛沒而秦亡故曰非特殤
公然也

滕子來朝

滕降而子杞薛降而伯謂王黜乎桓惠何以猶能
也曰僅於小弱焉爾僭王僭公未之或黜也三國
之黜也春秋不紀其罪或薄乎云爾猶不能明告
於諸侯也古言之矣賞不遺小罰不踰大非然者
政之失也

三月公會齊侯陳侯鄭伯于稷以成宋亂

以成宋亂惡名也或曰禮爲尊者諱此何爲獨不
然且仕定哀而斥桓莊其不蒙誹謗之議者何也
曰上所諱者諱之臣之誼也上所不諱者不諱之
史之文也何以明桓公之不諱乎成宋亂也曰魯
之連齊結鄭以伐宋也且比年矣魯齊鄭與宋爲
讐者也聞宋之有弑君者慶其災禍而獎其叛逆
明明告會之謀皆曰以成宋亂也故以賂噐薦之
宗廟而曾莫之耻也當時鳴其得意後世著爲深

非故曰其文則史其義則丘竊取之也

夏四月取郟大鼎于宋戊申納于大廟

秋七月杞侯來朝

公穀作紀侯

蔡侯鄭伯會于鄧

九月入杞

公及戎盟于唐冬公至自唐

三年春正月公會齊侯于贏

夏齊侯衛侯胥命于蒲

六月公會杞侯于郕

杞公作紀郕公作盛

秋七月壬辰朔日有食之既

公子翬如齊逆女

九月齊侯送姜氏于謹

溺愛踰禮君子以文姜之過由齊僖也易曰家人有嚴君焉父母之謂也既嫁而繾綣勿舍以出境亡禮其教不嚴也素矣不以禮始者未有以禮終也

公會齊侯于謹

非親迎也曰公會齊侯于謹重齊侯也重齊侯者

大乎齊也父大者女驕故娶欲其不如已也詩曰
雖則如雲匪我思存縞衣綦巾聊樂我員言舍大
而取小也

夫人姜氏至自齊

冬齊侯使其弟年來聘

有年

四年春正月公狩于郎

夏天王使宰渠伯糾來聘

五年春正月甲戌己丑陳侯鮑卒

陳侯以二日卒何也曰再赴也太子免立矣公子
佗又代之蓋攘爲喪主而再赴于諸侯也君之立
世子以爲此日也正名位以定其統擇師傅以裨
其教善輔託以佑其終則姦邪何自而窺之哉否
則一旦不豫于深宮而強臣起篡奪之謀外庭罹
狐疑之變君之嗣子未知其誰也詩曰宛其死矣
他人入室言無遠慮也

夏齊侯鄭伯如紀

天王使仍叔之子來聘

仍穀作任

葬陳桓公

城祝丘

秋蔡人衛人陳人從王伐鄭

王率諸侯伐鄭不書王以者何王不能左右之也
蔡衛陳先奔而王卒亂故曰王不能左右之也不
書敗者何孔子曰以臣召君不可以訓况於敗乎
然觀所從蔡衛陳而不言敗敗可知也

大雩

蝻公作蠧後同

蝻旱蟲也旱不為雩止也曰以雩止旱猶焚巫尪
以求雨也君子之祈天以振我民以實不以文也

冬州公如曹

六年春正月寔來

寔猶實也假如曹而實來魯也州公于曹則過而
不居于魯則寓而不復故曰假如曹而實來魯也
然則何義乎曰上多疑而下無任人故欲託魯而
詭其行成君於境棄國於外也詩曰大無信也不
知命也能信則足以任人而不疑矣知命則可以

守國而不棄矣

夏四月公會紀侯于成

穀胡並作邲

秋八月壬午大閱

蔡人殺陳佗

佗嘗從王伐鄭矣何以猶未得爲諸侯也曰弑君之賊雖黽勉以從王而莫之贖也雖天子之尊而莫之庇也知此義也則知斬丁公爲是而封子密爲非矣

九月丁卯子同生

冬紀侯來朝

七年春二月己亥焚咸丘

夏穀伯綏來朝鄧侯吾離來朝

穀鄧何以名曰越境千里而朝人失國之君也

八年春正月己卯烝

天王使家父來聘

詩曰家父作誦以究王誦王不能厠諸左右予違女弼而命以驅馳來聘求車非所任也詩曰或息偃在牀或不已於行言小人內而君子外也

夏五月丁丑烝

書再烝或曰是祭不欲瀆乎曰四時皆有祭先王之制也其義不繫於祭而繫於烝也烝者衆也備衆物以祭也踰時再烝非其制矣君子不敢惜已之資以薄其先亦不敢竭民之力以難其繼故享禮有節品物維時也

秋伐邾

冬十月雨雪

祭公來遂逆王后于紀

婚禮雖天子不自主也以同姓諸侯爲之主受命于魯以逆王后來不言使可也猶有先王之遺焉斯禮亡而平陽之婢蕭寺之尼天子以意自爲之矣李勣之言曰此陛下家事何必更問外人於是唐之不絕也如綫勣言誤之也孟子曰遵先王之法而過者未之有也

九年春紀季姜歸于京師

夏四月

秋七月

冬曹伯使其世子射姑來朝

十年春王正月庚申曹伯終生卒

夏五月葬曹桓公

秋公會衛侯于桃丘弗遇

冬十有二月丙午齊侯衛侯鄭伯來戰于郎

十有一年春正月齊人衛人鄭人盟于惡曹

夏五月癸未鄭伯寤生卒

秋七月葬鄭莊公

鄭來戰矣死會其葬禮也君子于死不為讐是以知子胥之鞭楚平之尸也雖路人猶將已之且故君也

九月宋人執鄭祭仲突歸于鄭鄭忽出奔衛

柔會宋公陳侯蔡叔盟于折

公會宋公于夫鍾

冬十有二月公會宋公于闕

十有二年春正月

夏六月壬寅公會杞侯莒子盟于曲池

杞公穀作紀曲池公作歐

秋七月丁亥公會宋公燕人盟于穀丘

八月壬辰陳侯躍卒

公會宋公于虛虛公作鄒

冬十有一月公會宋公于龜

丙戌公會鄭伯盟于武父

丙戌衛侯晉卒

書再日以明禮也兩君方成盟會之好而同姓諸侯以是日赴至則行聞喪之禮焉可也禮以凶廢

吉不以吉廢凶也或曰卒日皆以赴至乎曰天王之崩書以庚戌仲遂之卒書以辛巳陳侯鮑之卒也再赴則再日故知皆書赴至之日也

十有二月及鄭師伐宋丁未戰于宋

言及不言公承辭也承夫鍾闞穀丘虛龜之盟會以為言也屢盟會而卒戰伐也

十有三年春二月公會紀侯鄭伯已巳及齊侯宋公衛侯燕人戰齊師宋師衛師燕師敗績

戰何以稱君曰忿在已也敗何以稱師曰毒在衆

也君以畜民者也兵以捍民者也數國之君各有其私忿而分黨合謀約日誓戰以致挫衄其衆其衆則何罪也燕何以稱人曰燕則無他焉弱以從人者也

三月葬衛宣公

夏大水

秋七月

冬十月

十有四年春正月公會鄭伯于曹

無冰

夏五

夏五者其果聖人之闕疑歟曰否不能定謂之疑不敢錄謂之闕蓋傳聞之事與時俗之是非也此何以夏五也曰春秋備四時無事則紀孟有事則紀餘夏五者夏五月也以爲闕則已錄之矣以爲疑則聖人何疑于此哉魚魯豕亥之謬賢者正之而謂聖人不能豈可也然則何以闕也曰後失之也埋于秦出于漢猶之乎魚魯豕亥也

鄭伯使其弟語來盟

語穀作禦

秋八月壬申御廩災

乙亥嘗

齋以祭所以一心也君子遇災而懼為之改齋可也

冬十有二月丁巳齊侯祿父卒

宋人以齊人蔡人衛人陳人伐鄭

十有五年春二月天王使冢父來求車

三月乙未天王崩

夏四月己巳葬齊僖公

五月鄭伯突出奔蔡鄭世子忽復歸于鄭

突不正然則目之為君者曰臣既以為君則終以為君矣所以示祭仲也忽嘗即位然則目之為世子者曰父既以為世子則終以為世子矣所以示鄭突也

許叔入于許

公會齊侯于艾

艾公作鄆穀作蒿

邾人牟人葛人來朝

秋九月鄭伯突入于櫟

冬十有一月公會宋公衛侯陳侯于袤伐鄭宋公上公有齊

侯袤公作侈

十有六年春正月公會宋公蔡侯衛侯于曹

夏四月公會宋公衛侯陳侯蔡侯伐鄭

曹之會蔡則先衛而此獨後焉何也曰袤之師四國先伐鄭矣今也或以主謀而倡率或以夙諳而前行此師進之序也詩曰擊鼓其鏜踴躍用兵土國漕我獨南行言先事而勞民也

秋七月公至自伐鄭

告至禮也出以是事入以是事遂以專事告也曰經時易月從人伐人而詡詡然其矜諸宗廟焉也詩曰孝思不匱永錫爾類同姓之謂何而詡詡然其矜諸宗廟焉也

冬城向

十有一月衛侯朔出奔齊

十有七年春正月丙辰公會齊侯紀侯盟于黃

二月丙午公會邾儀父盟于趨會公穀作及會上穀無公字

夏五月丙午及齊師戰于奚

奚穀作郎

言及不言人承辭也承黃之盟以爲言也春盟而夏戰也

六月丁丑蔡侯封人卒

秋八月蔡季自陳歸于蔡

或曰蔡季之賢傳無事實而先儒以爲賢者何也曰以其稱字也雖然季安得爲賢乎吾信之於經矣賢者進必以禮退必以義書曰自陳歸于蔡非倚外援乎賢者事死如生事亡如存書曰葬蔡桓

侯非異死君乎然則其稱字也何居曰或以賢或以貴逐君之祭仲也猶然

癸巳葬蔡桓侯

葬何以不稱公曰蔡季之無禮於先君也臣子稱公列國稱侯其時則皆然矣蔡季賴于陳以歸也蓋以昆弟不爲喪葬主故不從臣子之稱也或以季能正先君之僭而可乎曰生稱而事之死稱而黜之惟烏喙勾踐之于吳夫差則可也

及宋人衛人伐邾

言及不言人承辭也承趙之盟以為言也春盟而秋伐也

冬十月朔日有食之

十有八年春王正月公會齊侯于濼

公與夫人姜氏遂如齊 公無與字

遂者繼事也然則濼之會夫人在矣何以不言與夫人也曰兩君自為會而非夫人事也非夫人事而挈之以行是溺情而贖禮也如齊何以言與夫人不言及夫人也曰及者公之事而及之與者夫

人事而與之也夫人事而隨之以往是屈體而徇愛也諸侯非國事不出都非王事不踰境詩曰言告師氏言告言歸君夫人之歸也佑之以保傅可也

曰遂忽之也禮無父母不歸寧以謹微也公也忽之而遂如之豈知其死於是行哉以是知言動視聽之必於禮也蔡哀侯見息媯而喪師晉孝武朝張氏而殞命其末則大矣本則甚微也

夏四月丙子公薨于齊

丁酉公之喪至自齊

秋七月

冬十有二月己丑葬我君桓公

或曰桓公書葬穀梁子以爲不責其踰國而討也然乎曰如不責其踰國而討也我君不若齊簡公也陳恒弑簡公孔子沐浴而朝請討之是非踰國而討乎且用魯之衆問齊之罪豈其以社稷殉也君子不責之乎如不責其踰國而討也則春秋於魯莊公何復以忘讐刺之也然則書葬也何義

曰齊以彭生說魯魯亦以彭生自說也魯君臣以爲賊已誅怨已釋而侈侈然葬之視其君若無憾也君子紀其實以爲不明大讐所主而強以微賊自解遂終至於不復也嗚呼疇昔有紅丸之事矣請究其主者然乎姑結其局者然乎

春秋本義卷二

春秋本義卷之三

禦兒顧朱著

莊公

元年春王正月

三月夫人孫于齊

不書姜氏者何曰婦人爲惡于夫家則出歸于父母之族今文姜姦于齊而孫于齊豈可乎故不書姜氏絕于齊也不當更以齊爲父母之族而使之爲可歸也然則義如之何曰寘于國宮以母事之

而以禮閑之可也若父母在可絕乎曰婦人之義從夫而已夫之讐雖父母可絕也况于甥乎猗嗟之詩曰展我甥兮蓋魯莊公之猶盡乎甥也

夏單伯送王姬

送公穀胡並作逆

秋築王姬之館于外

築之何也曰尊之爲之築也外之何也曰別之爲之外也雖以同姓爲之主婚必有尊也必有別也于君臣爲之尊于男女爲之別或曰是遠仇讐也歟曰未書其爲齊王姬也儼然天子之女烏得而

仇之哉然則主王姬之嫁謂之何曰謂其不能明仇讐以告天子明仇讐以告天子天子不爲之使而辭爲之主可也或曰遇仇讐雖王命亦當廢歟曰及身則不可及父母則可君父一也有死不從不義貞臣之義也請之而不受可也姑受之而中廢不可也或曰國事有非我不圖存者何歟曰不以父之仇滅君之國終其事而修其怨可也

冬十月乙亥陳侯林卒

王使榮叔來錫桓公命

王姬歸于齊

王姬之不稱伯季何也曰禮問名則知伯季諸侯不敢問名于天子也其曰歸于齊雖天子之女必降以從夫也

齊師遷紀邢鄆郟

二年春王二月葬陳莊公

夏公子慶父帥師伐於餘丘

公子者何桓公庶長子也莊公成童而卽位未能離慈母之懷而申不共之義者也慶父於桓則爲

親子于國則爲執政不思引君于當道惟仇讐之是圖而區區焉剪附庸之邑以自逞其權非貴戚大臣之誼矣故稱公子以明之也

秋七月齊王姬卒

母從子者也至王姬之嫁而夫人繼之以歸魯服王姬之喪而夫人繼之以會齊莊公惟無不共戴天之誠夫人于是自忘其罪故曰母從子也禋之會祝丘之饗伺莊公之忘讐而爲之者也

冬十有二月夫人姜氏會齊侯于禚

禚公作郟

春秋左傳卷三十三
不曰如齊非歸寧也假外事而行也曰會齊侯于
禚若兩君之會故曰假外事而行也莊公童年而
卽位匪惟不能制其母而國之大事毋得干預以
遂其私于是乎伐衛圍邾數數焉惟齊是從也已
禮婦人不及外事及外事姦之濟也

乙酉宋公馮卒

三年春王正月溺會齊師伐衛

師穀作侯

夏四月葬宋莊公

五月葬桓王

王崩七年而後會葬何也傳曰改葬也改葬何以
書曰改葬爲之總追遠之禮也三年而除不敢過
也遇事而易服孝子有終身之憂也或曰古不修
墓而改葬可乎曰不修墓謂慎其始窆也苟有未
至委其親於水澤之交也不若其改之也無所見
焉視子孫之休咎而遷之則不敢也或曰宋仁宗
之于其生母也何居曰改葬可也啓棺視屍則不
可也

秋紀季以鄆入于齊

先儒與乎紀季之存祀也然乎曰吾然之也久矣
 吾未之安也挾君之采邑去其君而降其敵而曰
 以存五廟吾未之安也若此說也則臧武仲以防
 求為後于魯誠不得已乎出公輒之遵王父命而
 守衛也可為乎微子抱器歸周之傳不必疑乎祭
 仲逐君以全社稷將從公羊氏而賢之乎數說者
 吾未之安也然則春秋之旨可聞歟曰春秋之旨
 定其辭肖其事而已矣書曰紀季以鄫入于齊者
 是紀季挾君之采邑去其君而降其敵也其言入

不言降何也曰齊加于郕而郕降之者謂之降也
 齊未嘗加于鄫而鄫入之者謂之入也

冬公次于滑 滑公穀作郕

四年春王二月夫人姜氏享齊侯于祝丘 享公穀作饗

三月紀伯姬卒

夏齊侯陳侯鄭伯遇于垂

紀其近者也陳鄭其遠者也齊侯有圖紀之心遠
 交陳鄭以絕其援于是紀侯度不能而去其國矣
 此范睢謀秦之術而六國所以亡也然齊襄弑于

無知秦祚移于胡亥吁其不憂蕭牆之內者與紀侯大去其國

紀侯去國不書名惟諸侯失國則名去之日猶未失也若曰國猶未失而紀侯自去其國焉爾諸侯之國稟于王室受之先世守之可也殉之可也度其不克豫去之可乎哉然則古公去邠何歟曰去邠非去國也詩曰迺立冢土戎醜攸行蓋遷都也今非遷之之謂也是以紀侯而曰大去其國其義固異乎書名也

六月乙丑齊侯葬紀伯姬

秋七月

冬公及齊人狩于禚

禚公穀作郛

狩先王所以教武事也踰國而從仇讐其武事也將安教乎故曰及齊人非其人也狩于禚非其地也車攻吉日先王田獵之詩也其曰東有甫草駕言行狩又曰溱沮之從天子之所言其地不過畿內之曠圃閒藪也其曰悉率左右以燕天子又曰以御賓客且以酌醴言誠信以率其下忠敬以事

其上禮讓以睦其友朋然後肅肅然雖雖然作其親上死長之義也禚齊也齊讐也其曰公及齊人狩于禚是內為志乎踰國而從仇讐也

五年春王正月

夏夫人姜氏如齊師

師衆地也危事也夫人何以與之乎曰婦人之不敢為非也不習見也是以行不踰闕出必垂帷所居不過閨閣所議不過酒食及衆地則赧然而退聞危事則怵然而懼若夫姜氏之出行也縱于禚

甚于師極于莒皆桓公摯以會灤始之也故漢高祖携呂氏于軍中卒有殺戮親子之慘唐高宗坐武氏于屏後遂為傾移國祚之漸婦人之敢為非也未有不以其習見也

秋邾犁來來朝

犁公穀胡並作黎

冬公會齊人宋人陳人蔡人伐衛

六年春王正月壬子突救衛

夏六月衛侯朔入于衛

秋公至自伐衛

螟

冬齊人來歸衛俘

俘公穀作寶

七年春夫人姜氏會齊侯于防

夏四月辛卯夜恒星不見夜中星隕如雨

辛卯夜穀夜作昔隕

公作實凡實字後同

恒星者常見也常見而不見謂之變也星或入或出或名或不名恒星不見者猶有見焉也辛卯夜者是恒星不見者通夜也夜中者止夜中隕也隕石則地星隕則不地但見上也如雨衆亂也衆亂

故類言乎星也或曰周與列國誰屬歟曰凡見之者謂之變敬其事戒其心周不可以委列國列國不可以委周也記曰迅雷風烈必變是豈爲孔子而孔子變故言天者不言分主可也

秋大水無麥苗

國不一邑邑不一產然則螽者螟蠹者無禾與麥苗者豈其必舉國也而舉國言之何也曰均災也親災者食之不親災者食貴君子不忍爲之異同也怒無寧異憫無寧同故一指之劓則舉身不樂

一邑之擾則舉國不康

冬夫人姜氏會齊侯于穀

八年春王正月師次于郎以俟陳人蔡人

郎魯地也與陳蔡遠矣何以俟陳蔡也曰虛爲之也虛爲俟陳蔡而實則聽謀乎齊以從事乎郕也王者若天道以誅暴亂諸侯若王命以征不軌則師出之日告于廟誓于衆明其不得已而用之也曰玃狁孔熾我是用急先王出師之詩也廼舉一國之衆以徇人而其事不能公言也姑虛爲之名

以行其詐曰我聞有命不敢以告人此從亂之詩也

甲午治兵

治公作祠

古者治兵而出未聞出而治兵也勝在廟堂不在邊境之上也教在居恒不在行陣之日也

夏師及齊師圍郕郕降于齊師

郕公作成

秋師還

冬十有一月癸未齊無知弑其君諸兒

九年春齊人殺無知

公及齊大夫盟于蕪

蕪公穀作暨

夏公伐齊納子糾齊小白入于齊

糾字上公穀胡無子字

秋七月丁酉葬齊襄公

八月庚申及齊師戰于乾時我師敗績

九月齊人取子糾殺之

不曰齊侯而曰齊人何也君臣同責也不曰齊人

殺子糾而曰齊人取子糾殺之何也齊魯同責也

鮑叔帥師來言能脫射鉤之囚而不釋先君之子

言人不止尊者矣故曰君臣同責也魯侯治兵納

糾既奉之于前而遽殺之于後言取必有與者矣故曰齊魯同責也

冬浚洙

十年春王正月公敗齊師于長勺

二月公侵宋

三月宋人遷宿

夏六月齊師宋師次于郎公敗宋師于乘丘

秋九月荆敗蔡師于莘以蔡侯獻舞歸

舞穀作武

或謂荆或謂楚何也荆地而楚國也先王封鬻熊

于楚楚猶列國也何謂地不謂國乎曰政教不及南服職貢不及京師中國之人久而忘其為楚而漫謂曰荆蠻焉爾要荒諸侯不在天子之胸而僭侈畜強以自大其國中國曾莫之聞曾莫之謀而浸致其害也迨齊桓公曰昭王南征不復寡人是問苞茅不貢無以縮酒寡人是徵始責以楚之故事而楚始服然則楚猶列國之諸侯不當以蠻置之而不治也故謂荆者當時之實稱非夫子之所改也其後憑陵日甚勢及畿內諸侯畏懼而故號

顯張楚之稱楚自伐鄭始不然者以荆為貶以楚為進則伐鄭何善也而君子進之哉或曰然則不貶荆乎曰政教不及南服職貢不及京師使中國之人目其為蠻而忘其為楚則謂之大貶可也故曰春秋之道如天天運其自然而萬物資春秋書其自然而百行彰

冬十月齊師滅譚譚子奔莒
 十有一年春王正月
 夏五月戊寅公敗宋師于鄆

秋宋大水

冬王姬歸于齊

其曰歸于齊者雖天子之女必外嫁以從夫也後之尚主者賜第京師終身不復返非禮也

十有二年春王三月紀叔姬歸于鄆

婦從夫者也夫死而子絕從夫之昆弟可乎曰奚爲其不可是承夫之統而夫之祭祀託焉者也今之孀從父母居可乎曰是不得與祭夫矣婦不可祭夫于父母之家也必若無宗焉近父母居以爲

之居可也

夏四月

秋八月甲午宋萬弑其君捷及其大夫仇牧

捷公作接

宋閔公之衛其出也惟以仇牧仇牧弱而閔公弑矣非特閔公然也鴻門多士而漢興劍閣孤援而蜀滅故曰非特閔公然也

或曰仇牧從孔父荀息之義乎曰然宋閔公之弑于蒙澤也爲之衛者僅牧焉也古者人君備法駕而出虎賁在前保相在後防不虞也故人君不爲

微服之行不為褻狎之見或曰然則春秋無死節乎曰公子邛握節以死書曰宋人殺其大夫司馬者是也

冬十月宋萬出奔陳

十有三年春齊侯宋人陳人蔡人邾人會于北杏侯穀

人作

夏六月齊人滅遂

秋七月

冬公會齊侯盟于柯

十有四年春齊人陳人曹人伐宋

夏單伯會伐宋

秋七月荆入蔡

冬單伯會齊侯宋公衛侯鄭伯于郵

十有五年春齊侯宋公陳侯衛侯鄭伯會于郵

夏夫人姜氏如齊

秋宋人齊人邾人伐邾邾公作兒

鄭人侵宋

冬十月

春秋本義

卷三 莊公

三

十有六年春王正月

夏宋人齊人衛人伐鄭

秋荆伐鄭

冬十有二月會齊侯宋公陳侯衛侯鄭伯許男滑伯

滕子同盟于幽

公作公會許男下公穀有曹伯

會不言公何也曰公無志乎盟也故雖外為會而國自為計曰我不與夫盟者故從內不從外也

邾子克卒

十有七年春齊人執鄭詹

詹公作瞻下同

夏齊人殲于遂

遂滅矣何以殲于遂也曰齊人戍遂而遂之遺民殺之也先王之取人國也未下車而式其賢士既下車而賚其窮民用其人以治其土得其民以守其國雖無戍焉可也取之以兵而守之以兵久則懈敵伺而動是敵雖滅而未滅也

秋鄭詹自齊逃來

冬多麋

十有八年春王三月日有食之

日食有度其日可致也有司不能致其日失救慝之禮過而後知之故不書日也書曰羲和尸厥官罔聞知是有司之罪也或曰夜食歟曰凡夜必繫于日若辛卯夜恒星不見是也

夏公追戎于濟西

秋有蝥

冬十月

十有九年春王正月

夏四月

秋公子結媵陳人之婦于郵遂及齊侯宋公盟

夫人姜氏如莒

屢如齊矣故雖非齊亦往也婦人之禮慎始而已始之不慎何有于他桑中之首章曰爰采唐矣沫之鄉矣其二章曰爰采麥矣沫之比矣其卒章曰爰采葑矣沫之東矣言其于鄉之既蕩而漸于北折于東也禮曰婦人不出境而弔其他可知也

冬齊人宋人陳人伐我西鄙

二十年春王二月夫人姜氏如莒

夏齊大災

紀隣災有二其相及也為之警以備其患其不相及也為之弔以恤其傷

秋七月

冬齊人伐我

戎穀作我

二十有一年春王正月

夏五月辛酉鄭伯突卒

秋七月戊戌夫人姜氏薨

冬十有二月葬鄭厲公

二十有二年春王正月肆大雩

雩公作省

癸丑葬我小君文姜

以合葬于我先君也故曰我小君也若文姜與弑乎桓而合葬可乎曰不可禮緣義者也是義絕于先君也生不事養是無生母也死不異葬是無死父也

陳人殺其公子御寇

御公穀作禦

曰陳人以黨殺也公子與乎敬仲者也然則公子

賢矣賢而公子猶不免焉况其餘乎扶蘇死而秦滅趙李之構也更生屈而漢亂恭顯之謀也君子以是知陳之先亡矣其國風曰墓門有梅有鴉萃止言羣小也

夏五月

秋七月丙申及齊高傒盟于防

冬公如齊納幣

二十有三年春公至自齊

祭叔來聘

夏公如齊觀社

公至自齊

荆人來聘

荆何以人之也曰定其交受其聘諸侯之與之爲人也或曰蠻而中國則中國之嘉其來也君子與之曰否荆則匪止蠻也僭王之國也同被先王之封而篡其名號民無二王而有二王焉是朝廷之賊而列國之寇也雖其來也義有不可受也故人之非所以進之也諸侯之與之爲人也

公及齊侯遇于穀

蕭叔朝公

秋丹桓宮楹

冬十有一月曹伯射姑卒

十有二月甲寅公會齊侯盟于扈

二十有四年春王三月刻桓宮桷

秋丹楹春刻桷增飾之累時也桓葬久而增飾者何致文姜也或曰文姜不可見于先君而不絕于子祔之與其不祔之與曰別宮而祭可也

葬曹莊公

夏公如齊逆女

秋公至自齊

八月丁丑夫人姜氏入戊寅大夫宗婦覲用幣

婦道教之于始者也丁丑入而戊寅大夫宗婦覲用幣汲汲乎示之以驕奢也昏禮次日見舅姑三日見廟教之卑也饋于舅姑餽姑之餘教之儉也其曰覲何也曰面以行禮也男女不相瀆瀆則亂也見夫人如之何曰望以行禮可也

大水

冬戎侵曹

曹羈出奔陳

赤歸于曹

郭公

二十有五年春陳侯使女叔來聘

夏五月癸丑衛侯朔卒

六月辛未朔日有食之鼓用牲於社

伯姬歸于杞

歸則有逆矣何以不言逆曰伯姬妾女也雖有逆

不重于父母而畧之也嫡夫人視妾子如已子視

妾女如已女義也君子以姜氏爲不義矣故畧伯

姬者殺子般之漸也或曰逆者微故不書曰是惟

微於父母而後人微之也

秋大水鼓用牲于社于門

冬公子友如陳

二十有六年春公伐戎公無春字

夏公至自伐戎

春秋左傳
卷三
曹殺其大夫

君前臣名其大夫而不名非君殺也然則何以不稱曹人曰非君殺故不稱名以國事殺故亦稱國也有道則法歸於上無道則法持于下此謂無君之辭也若宋人殺其大夫者以私事殺之也

秋公會宋人齊人伐徐

冬十有二月癸亥朔日有食之

二十有七年春公會杞伯姬于洮

非歸寧也曰會于洮者有事焉之辭也以是知杞

不復振矣語曰牝雞司晨惟家之索也

夏六月公會齊侯宋公陳侯鄭伯同盟于幽

秋公子友如陳葬原仲

如列國有不言所爲矣言所爲何也曰請於君明其事而後行也或曰大夫無境外之交然則友也非歟曰其交有自來也友嘗報聘于陳矣相成以道謂之朋相喻以志謂之友相成以道有終身庸之而不止相喻以志有歿世思之而不忘生而締交死而會葬義也請於君明其事而後行禮也

冬杞伯姬來

莒慶來逆叔姬

杞伯來朝

公會齊侯于城濮

二十有八年春王三月甲寅齊人伐衛衛人及齊人

戰衛人敗績

夏四月丁未邾子貜卒

秋荆伐鄭

公會齊人宋人救鄭

宋人下公有邾婁人

冬築郿

郿公穀作微

大無麥禾

不言水旱螟螽何也曰不省災而計入也

臧孫辰告糴于齊

于齊何也曰為齊許也齊桓公之命曰無遏糴于是有以糴告者也其度乎臧孫否也曰其度乎臧孫之謀身也矣謀國之道則否也告之辭難必也糴之辭難繼也齊魯邇隣也魯大無而齊有之其地有不同耶耶人事之異也

二十有九年春新延廡

廡非民事也言新為可緩也或曰凶年出其食以用民可乎曰凶年雖出其食以用民惟仍于民事為亟也否則俸今日之粟廢來日之業也

夏鄭人侵許

秋有蜚

冬十有二月紀叔姬卒

城諸及防

土功必以漸一時而城二邑驟也

三十年春王正月

夏次于成

公穀胡次上並有師字

秋七月齊人降鄆

八月癸亥葬紀叔姬

九月庚午朔日有食之鼓用牲于社

冬公及齊侯遇于魯濟

齊人伐山戎

齊人者何合君臣之詞也齊非管仲不為伐矣山戎病燕而齊伐之是桓公之霸而管仲之功也

三十有一年春築臺于郎

夏四月薛伯卒

築臺于薛

六月齊侯來獻戎捷

秋築臺于秦

役民必以暫三時而築三臺久也

冬不雨

三十有二年春城小穀

夏宋公齊侯遇于梁丘

秋七月癸巳公子牙卒

八月癸亥公薨于路寢

冬十月巳未子般卒

巳未公穀作乙未

公子慶父如齊

曰如齊非出奔也聘行而求好于齊也以哀姜爲內奧以齊桓爲外援慶父于是乎無忌矣王者使人恃而爲善霸者使人恃而爲惡君子蓋有貶乎齊桓也

狄伐邢

春秋本義卷三

御兒顧朱著

春秋本義卷之四

閔公

元年春王正月

齊人救邢

夏六月辛酉葬我君莊公

秋八月公及齊侯盟于落姑季子來歸

公在不名何也曰公也幼其來歸也不出乎公故從國人之稱之也以是見閔公之不能任季子

春秋本義 卷四
而季子不能有爲也主幼國疑惟賢大臣輔之然非幼主之親之信之也烏能有爲哉周成不悟則居東不返矣漢昭不察則免冠不起矣周公有成王而免于管蔡霍光有昭帝而免于燕蓋君爲之也季友有莊公而子牙可醜有僖公而慶父可逐君爲之也或曰落姑之盟以復季子何也曰公也幼落姑之盟公尸之也故盟因公而來歸不因公也雖國人望而復季子季子忠而返其國然無如其君何也

冬齊仲孫來

齊仲孫湫也何以不名曰齊之貴者也臣雖貴見隣國之君必名其不名者君自卑也內臣不名外臣不名是自卑不能主內臨外也

二年春王正月齊人遷陽

夏五月乙酉吉禘于莊公

秋八月辛丑公薨

九月夫人姜氏孫于邾

文姜孫于齊齊受之也哀姜孫于邾齊不受之也

春秋左傳卷四
齊何以不受之乎曰齊桓于是有禁惡之心矣能使其畏而不敢歸也齊桓所勿爲而邾爲之宜以來夫偃之師也曰婦人爲惡于夫家則出歸于母族母族不受而寧其四馳也邾受其歸而錮之可也

公子慶父出奔莒

冬齊高子來盟

十有二月狄入衛

鄭棄其師

僖公

元年春王正月

齊師宋師曹師次于聶北救邢

救而後書次救而次者也次而後書救次而救者也其次而救者何也曰以形勢臨之而邢賴以全也君子美齊桓之救尤美其不戰以救也是以異夫叔孫豹也曰叔孫豹救晉次于雍榆是救而後書次也殆無益于救也

夏六月邢遷于夷儀

公作陳儀後同

齊師宋師曹師城邢

秋七月戊辰夫人姜氏薨于夷齊人以歸

死而以其尸歸於齊也齊桓公以哀姜為義絕于魯也或曰是以喪歸于魯也曰桓公之喪二十三日而至哀姜之喪六月而至知非即歸喪于魯也哀姜之喪俟魯請而後至者也

楚人伐鄭

八月公會齊侯宋公鄭伯曹伯邾人于榿

榿公作打

九月公敗邾師于偃

偃公作纓

冬十月壬午公子友帥師敗莒師于鄆獲莒挈

鄆公作犁

季友之敗莒也公賜以汶陽之田及費曰是功不蔽賞也故書壬午曰卒日焉也帥師曰庸眾焉也獲莒挈曰僅得焉也一日之勞一人之俘而成乎一國之眾洋洋然賞以二邑為也夫治國尚賞功而罰罪也功小而賞大弱國之理也魯之季以敗莒封季友矣周之季以牧馬封非子矣蓋僖公德其立已而因此以過予之此後世假邊功以封私人之始也

十有二月丁巳夫人氏之喪至自齊

二年春王正月城楚丘

城楚丘不書諸侯何也曰有不足乎諸侯也前年冬狄入衛矣援師絕而隣封沒使宗室之諸侯剖肝以死此戎夷猾夏之甚而中國諸侯之變也安之踰年而城楚丘不亦末乎若曰是畚築之勞矣非所以尊王制攘夷狄也故畧諸侯而不書也或曰傳以為不與齊桓專封也然乎曰衛雖君死而國破然戴公衛人自立之君也楚丘其未亡之邑

也定之方中其自卜之居也甲士車乘周之可也罪之以專封齊桓勿受也

夏五月辛巳葬我小君哀姜

哀姜義絕于國何以曰葬我小君乎曰小君猶君也詩曰人之無良我以為君臣子豈可以君父之賢否為從違哉亂臣賊子必其君無禮者也以為可獲則獲之此篡弑所由來也然則春秋非賢否之書乎曰生之事既書之矣死則何言焉葬也者終乎臣子之事也漢光武以累世之孫追貶吕后

此可已而不已也

虞師晉師滅下陽

公穀作夏陽

秋九月齊侯宋公江人黃人盟于貫

貫公作貫澤

冬十月不雨

楚人侵鄭

三年春王正月不雨夏四月不雨

徐人取舒

六月雨

秋齊侯宋公江人黃人會于陽穀

冬公子友如齊涖盟

穀作公子季友涖
公穀作蒞後同

楚人伐鄭

四年春王正月公會齊侯宋公陳侯衛侯鄭伯許男

曹伯侵蔡蔡潰遂伐楚次于陘

夏許男新臣卒

許男之卒于師也不曰卒于師非王事也凡死王
事加二等今從諸侯伐人而葬之以侯且以袞歛
其誰命也君子書其卒也無異乎常而知葬有異
乎常者之非禮也君子守其身也雖死必以禮焉

雖死必以禮屬其臣若子焉臣若子必以禮事其君父而遇非禮以及其君父者必辭焉曰吾君吾父以禮榮身者也夫許臣子之事其君父也曾不若黔婁先生之妻之事其夫也

楚屈完來盟于師盟于召陵

齊人執陳轅濤塗轅公穀作袁

秋及江人黃人伐陳

八月公至自伐楚

葬許穆公

冬十有二月公孫茲帥師會齊人宋人衛人鄭人許人曹人侵陳茲公作慈後同

五年春晉侯殺其世子申生

先王之教教忠也又以教仁教孝也又以教慈故君不可以殺臣也不得已而殺臣則詢之于眾父不可以殺子也不得已而殺子則請之于王天子者聽之天下天下者聽之天子明人倫公王制也曰晉侯殺其世子申生者一人殺之也私也君之于臣父之于子猶不可以私殺之故殺也者欲其

不得已也

杞伯姬來朝其子

朝諸侯之禮也子幼母率之非禮也先言來後言朝者先之以歸寧也歸寧正也携其子非正也君嗣無故不遠適也

夏公孫茲如牟

公及齊侯宋公陳侯衛侯鄭伯許男曹伯會王世子于首止 首止公毅作首戴後同

國之危莫危于易世子矣易世子者父子睽兄弟

闖君臣貳而禍有不可言也然諸侯不朝王而會世子何也曰王有易世子之心矣未有易世子之命故不以諍于王而會世子以定世子也其會世子以定世子何也曰以人心之嚮往世子使王以世子為不可易也或曰然則為子植黨以制父歟曰嚮往其子者嚮往其父者也世子定則國家正社稷安忠世子所以忠王也故制之善者設太子之位使百官以時朝之示天下以同尊也置東宮之官即以天子之公卿領之示父子以無間也或

處深宮而不令出閣或開別館而自置私屬皆非所以安太子也

秋八月諸侯盟于首止鄭伯逃歸不盟

楚人滅弦弦子奔黃

九月戊申朔日有食之

冬晉人執虞公

六年春王正月

夏公會齊侯宋公陳侯衛侯曹伯伐鄭圍新城

秋楚人圍許諸侯遂救許

冬公至自伐鄭

七年春齊人伐鄭

夏小邾子來朝

鄭殺其大夫申侯

秋七月公會齊侯宋公陳世子欵鄭世子華盟于甯

母穀作寧母

曹伯班卒班公作般

公子友如齊

冬葬曹昭公

八年春王正月公會王人齊侯宋公衛侯許男曹伯
陳世子款盟于洮鄭伯乞盟

款下公有鄭世子華

夏狄伐晉

秋七月禘于太廟用致夫人

冬十有二月丁未天王崩

九年春王正月丁丑宋公御說卒

正月公穀作三月御公穀作禦

夏公會宰周公齊侯宋子衛侯鄭伯許男曹伯于葵

丘

秋七月乙酉伯姬卒

九月戊辰諸侯盟于葵丘

甲子晉侯倮諸卒

甲子公作甲戌倮公穀胡並作詭

冬晉里克殺其君之子奚齊

殺公作弑

穀梁子曰其君之子云者國人不子也不正其殺
申生而立之也曰若此言則里克之言也里克惟
以國人不子而以爲可殺之也過君之虛位則躍
遇君之路馬則式殺君之命子而謂本非其君可
乎君未葬則稱子其君之子云者猶曰里克乎是
爾君之子也

十年春王正月公如齊

狄滅溫溫子奔衛

晉里克弒其君卓及其大夫荀息

卓公作卓子

其大夫云者卓之大夫也卓之立也惟一臣息之立卓也惟一身則相與死而已卓也者國人不以爲君者也而曰弒其君何也曰命嗣而既絕矣以君之子一日立乎其位則君之矣廼曰是不當立者而殺之可已亂而不已亂是亂臣也弒其君曰及其大夫某者皆累辭也或以爲褒死

節之臣豈其然乎宋殤公之弒也孔父有妻而不能謹焉宋閔公之弒也仇牧在門而不知備焉杜氏言之審矣里克之將弒奚齊卓子也以語荀息荀息謂之曰人之欲善誰不如我我欲無貳而能謂人已乎然則息與聞乎弒而不知止之者也其不同于弒君之罪者猶恕辭也夏齊侯許男伐北戎晉殺其大夫里克里克弒二君矣使夷吾聞里克之弒君也稱兵討

賊誅而即位義也廼通乎里克以復其國是同惡也其大夫云者夷吾之大夫也然則何以殺之也曰以賊忌賊賊之常也左氏曰晉侯殺里克以說說乎篡也或曰奚齊卓子不正則夷吾曷為乎篡也曰奚齊先君之命嗣也雖不正後人言之則可臣子言之則不可使申生而在也亦將為臣無命嗣是無先君也然則卓子無命則夷吾曷為乎篡也曰卓子與夷吾等也等則從已立不從未立無已立之君是無社稷也故夷吾重耳者皆篡也

秋七月

冬大雨雪

雪公作雹

十有一年春晉殺其大夫平鄭父

夏公及夫人姜氏會齊侯于陽穀

秋八月大雩

冬楚人伐黃

十有二年春王三月庚午日有食之

夏楚人滅黃

秋七月

春秋本義

僖公

三

冬十有二月丁丑陳侯杵臼卒 杵公作處

十有三年春狄侵衛

夏四月葬陳宣公

公會齊侯宋公陳侯衛侯鄭伯許男曹伯于鹹

秋九月大雩

冬公子友如齊

十有四年春諸侯城緣陵

夏六月季姬及鄆子遇于防使鄆子來朝 鄆穀作繒後同

季姬之說何從乎左氏則曰鄆季姬來寧公怒止

之以鄆子之不朝也故遇于防而使來朝若此則

季姬已嫁矣曷為乎其嫁也不書歸其寧也不書

來且踰年而後書歸也怒其不朝而絕之故不繫

鄆則來朝之後又何俟乎踰年而歸歸而仍曰季

姬不曰鄆季姬也穀梁氏則曰遇者同謀也若此

則季姬淫通矣以僖公之為君若父也未必其然

而中葍之羞臣子所宜諱也胡氏則曰僖公溺愛

其女使自擇配也以經考之未嘗有隆待乎季姬

也且公宜自致鄆子而使擇配于國不當遠遇于

防而擇配于野也然則有說乎曰是許字而未歸者也既許鄆矣公有怒乎鄆子也將中絕之季姬以為既許不可絕乃自遇于防而使其來朝以求踐也當時以為義故不以為諱其果義乎曰非義也禮女子雖許字猶未得為夫婦也故不繫鄆父不義以義告其父而待於中閨可也

秋八月辛卯沙鹿崩

狄侵鄭

冬蔡侯肸卒

十有五年春王正月公如齊

楚人伐徐

三月公會齊侯宋公陳侯衛侯鄭伯許男曹伯盟于

牡丘遂次于匡公孫敖帥師及諸侯之大夫救齊帥公

作率後同

夏五月日有食之

秋七月齊師曹師伐厲

八月螽

九月公至自會

季姬歸于鄆

已卯晦震夷伯之廟

史書必有繫于國其震大夫之廟也何以書曰君以敬天而臨民天子不以諸侯之災而莫之矜也諸侯不以大夫之災而莫之懼也故四垂之變達于天子一境之異布于諸侯而况乎堵雉之內也冬宋人伐曹
楚人敗徐于婁林
十有一月壬戌晉侯及秦伯戰于韓獲晉侯

十有六年春王正月戊申朔隕石于宋五是月六鷁

退飛過宋都

鷁穀作鷁

三月壬申公子季友卒

夏四月丙申鄆季姬卒

鄆季姬內女也卒而不書葬曰魯不會其葬也鄆弱昏不能自圖間嘗失意于魯而魯遂鄙棄之是以有闕禮焉君子之遇其戚也無強弱無榮枯何魯僖公之不古也

秋七月甲子公孫茲卒

冬十有二月公會齊侯宋公陳侯衛侯鄭伯許男邢侯曹伯于淮

十有七年春齊人徐人伐英氏

夏滅項

秋夫人姜氏會齊侯于卞

曰會齊侯于卞有事之詞也齊止公而夫人會以釋之也止國君而釋于婦人齊桓之衰也滋甚為國君而釋于婦人魯僖之耻也滋甚服其罪而舍之庶乎齊桓之為桓也正其辭而免之庶乎魯僖

之為僖也

九月公至自會

冬十有二月乙亥齊侯小白卒

十有八年春王正月宋公曹伯衛人邾人伐齊

宋公下公會字

夏師救齊

五月戊寅宋師及齊師戰于靡齊師敗績

狄救齊

秋八月丁亥葬齊桓公

春秋左傳卷四
冬邢人狄人伐衛

狄何以稱人穀梁子曰善累而後進之伐衛所以救齊也功近而德遠矣愚則曰不然若以其救齊而進之也何不人之于救齊而人之於伐衛也且以經考之伐衛豈所以救齊哉救齊者以齊有難焉也齊之師在春而敗在夏始狄之救齊也已無及矣况至于秋孝公立而桓公葬至于冬師久退而難益解則伐衛豈所以救齊也或以衛曾伐齊而移伐之則是擅征伐之權爲齊修怨而非爲齊

排患也君子何予之哉惟以爲救齊而人之也故二十年秋齊人狄人盟于邢穀梁子亦曰其爲主乎救齊夫救齊者以齊有難焉也敵國無侵併之強而齊無危亡之蹙曷爲乎再踰年而猶議救之也然則其人之何也曰紀其實而已矣人之非所以進之也諸侯之與之爲人也與之伐衛者邢人也與之盟邢者齊人也皆不言及蓋其時以狄爲同類而敵體也故邢先乎狄邢前導也君子以爲大惡者也然則晉侯會狄于攢函駸駸乎其與之

春秋本義 卷四 七
矣不曰狄人何也曰書外會以往會書不以並會
書猶未至乎同類而敵體也
十有九年春王三月宋人執滕子嬰齊
宋執則非矣其名滕子何也曰滕子蓋屈于宋而
不自成其爲君矣何以知其然鄆子執而不屈以
是怒而用于社滕子執而屈以是釋而還于國也
君子持身以禮制事以義不以尊富而益也不以
困難而損也辭不失正謂之義死不變塞謂之禮
若夫奴顏婢膝以冀活匹夫耻之而况國君乎苟

能免焉如叔孫昭子可也

夏六月宋公曹人邾人盟于曹南鄆子會盟于邾已

酉邾人執鄆子用之 宋公公作宋人

秋宋人圍曹

衛人伐邢

冬會陳人蔡人楚人鄭人盟于齊 公作公會

梁亡

二十年春新作南門

夏郟子來朝

春秋本義

卷四 僖公

七

五月乙巳西宮災

鄭人入滑

秋齊人狄人盟于邢

冬楚人伐隨

二十有一年春狄侵衛

宋人齊人楚人盟于鹿上

夏大旱

秋宋公楚子陳侯蔡侯鄭伯許男曹伯會于孟執宋

公以伐宋

孟公作霍穀作雩或作宇

冬公伐邾

楚人使宜申來獻捷

宋捷也何以不言宋曰不可以言宋也言宋則似

執宋公以來獻也謂以捷音相聞而非有遺之以

俘馘也楚使也何以不言楚子曰不可以言楚子

也言楚子則是舍諸侯以從獨也宜申之來也盛

諸侯之協同以將捷命言諸侯則實楚子言楚子

則遺諸侯故不曰楚子而曰楚人若是乎諸侯之

皆楚人也衆屬之辭也同惡之辭也故執宋公釋

宋公皆溷言諸侯而不專言楚子也

十有二月癸丑公會諸侯盟于薄釋宋公

二十有二年春公伐邾取須句句公作胸

夏宋公衛侯許男滕子伐鄭

秋八月丁未及邾人戰于升陘

冬十有一月己巳朔宋公及楚人戰于泓宋師敗績

二十有三年春齊侯伐宋圍緡緡穀作閔後同

夏五月庚寅宋公茲父卒茲公作慈

或曰宋襄公之不書葬也以其師敗曰何以陳桓

公之書葬也書葬不以其賢也且君子之于義也

敗而黜之抑將勝而許之也與哉蓋有會其葬者

有不會其葬者宋襄公之不書葬也諸侯莫與會

也諸侯尊楚而遺宋敗則黜之勝則許之諸侯之

志也

秋楚人伐陳

冬十有一月杞子卒

二十有四年春王正月

夏狄伐鄭

秋七月

冬天王出居于鄭

晉侯夷吾卒

惠公不書葬文公篡之也文公之出亡也寺人披逐而斬其袪及還國而求見也文公讓之披曰除君之惡惟力是視蒲人狄人余何有焉曰是誠寺人之言也君子之事君也從其義不長其惡謂父兄殺子弟而惟力是視乎田叔毀獄李沆焚詔焉可也寺人披者江充之類也

二十有五年春王正月丙午衛侯燬滅邢

夏四月癸酉衛侯燬卒

宋蕩伯姬來逆婦

蕩伯姬以姑逆婦非禮也親迎子事也凡事子可以代父母父母不可以代子也親迎男事也男女不干事禮也或曰婚有期矣子病如之何曰婚有期而子病改日可也女未成者也不以疾病不可知之身而成人之女仁也

宋殺其大夫

秋楚人圍陳納頓子于頓

兩事不言遂何也曰一時而兩事圍陳所以納頓也

葬衛文公

冬十有二月癸亥公會衛子莒慶盟于洮

衛君葬矣何以猶稱子也曰君死不踰年不成其為君禮也

二十有六年春王正月己未公會莒子衛甯速盟于

向速公作邀後同

齊人侵我西鄙公追齊師至鄒弗及

鄒公穀作雋

夏齊人伐我北鄙

衛人伐齊

公子遂如楚乞師

秋楚人滅夔以夔子歸

夔公作隗人穀作子

冬楚人伐宋圍緡公以楚師伐齊取穀

公至自伐齊

二十有七年春杞子來朝

夏六月庚寅齊侯昭卒

秋八月乙未葬齊孝公

乙巳公子遂帥師入杞

冬楚人陳侯蔡侯鄭伯許男圍宋

十有二月甲戌公會諸侯盟于宋

二十有八年春晉侯侵曹晉侯伐衛

侵曹曰晉侯伐衛復曰晉侯著晉侯之譎也晉侯

蓋先曹矣計楚人之救曹也並伐衛以綴楚人迨

楚人救衛而晉侯遂得入曹矣故曹曰侵而衛曰

伐侵則陰為謀也伐則陽為勢也若皆以晉侯示

之而不知晉侯所在者然也晉之師因乎救宋而

不俟乎救宋也故不言救宋修舊憾懾小國雖無

宋急猶興者也故止言侵曹伐衛也

公子買戍衛不卒戍刺之

楚人救衛

城濮之師君子不予晉也晉侯曰救宋矣何以不

予之乎曰伐無故之曹衛以救宋非義救也故以

救衛書楚而不以救宋書晉也

三月丙午晉侯入曹執曹伯畀宋人

夏四月己巳晉侯齊師宋師秦師及楚人戰于城濮
楚師敗績

楚殺其大夫得臣

衛侯出奔楚

五月癸丑公會晉侯齊侯宋公蔡侯鄭伯衛子莒子

盟于踐土

陳侯如會

公朝于王所

六月衛侯鄭自楚復歸于衛衛元咺出奔晉

陳侯欸卒

秋杞伯姬來

公子遂如齊

冬公會晉侯齊侯宋公蔡侯鄭伯陳子莒子邾子秦

人于温晉侯下穀無齊侯

天王狩于河陽狩穀作守

壬申公朝于王所

晉人執衛侯歸之于京師衛元咺自晉復歸于衛

諸侯遂圍許曹伯襄復歸于曹遂會諸侯圍許

二十有九年春介葛盧來

公至自圍許

夏六月會王人晉人宋人齊人陳人蔡人秦人盟于

翟泉

會上公有公
字翟公作狄

秋大雨雹

冬介葛盧來

三十年春王正月

夏狄侵齊

秋衛殺其大夫元咺及公子瑕衛侯鄭歸于衛

晉人秦人圍鄭

介人侵蕭

冬天王使宰周公來聘

公子遂如京師遂如晉

三十有一年春取濟西田

公子遂如晉

夏四月卜郊不從乃免牲猶三望

秋七月

冬杞伯姬來求婦

狄圍衛十有二月衛遷于帝丘于穀作於

三十有二年春王正月

夏四月巳丑鄭伯捷卒捷公作接

衛人侵狄

秋衛人及狄盟

冬十有二月巳卯晉侯重耳卒

三十有三年春王二月秦人入滑

齊侯使國歸父來聘

夏四月辛巳晉人及姜戎敗秦師于殽秦下公胡無師字

癸巳葬晉文公

狄侵齊

公伐邾取訾婁訾婁公作叢穀作訾樓

秋公子遂帥師伐邾

晉人敗狄于箕

冬十月公如齊

十有二月公至自齊

乙巳公薨于小寢

隕霜不殺草李梅實

晉人陳人鄭人伐許

許公死於師

許公死於師

許公死於師

許公死於師

許公死於師

許公死於師

許公死於師

春秋本義卷四

春秋本義卷之五

禦兒顧朱著

文公

元年春王正月公即位

二月癸亥日有食之

公日上有朔字

天王使叔服來會葬

夏四月丁巳葬我君僖公

天王使毛伯來錫公命

晉侯伐衛

叔孫得臣如京師

衛人伐晉

秋公孫敖會晉侯于戚

冬十月丁未楚世子商臣弑其君頹

頹公穀作髡

公孫敖如齊

二年春王二月甲子晉侯及秦師戰于彭衙秦師敗

績

丁丑作僖公主

三月乙巳及晉處父盟

夏六月公孫敖會宋公陳侯鄭伯晉士穀盟于垂隴

穀穀作穀垂隴公穀作垂斂

自十有二月不雨至于秋七月

八月丁卯大事于大廟躋僖公

冬晉人宋人陳人鄭人伐秦

公子遂如齊納幣

若二十六月而納幣可乎曰二十五月而喪寢矣
餘猶謂之禫君子不忍其遽也

三年春王正月叔孫得臣會晉人宋人陳人衛人鄭

人伐沈沈潰

夏五月王子虎卒

秦人伐晉

秋楚人圍江

雨蝨于宋

冬公如晉十有二月己巳公及晉侯盟

晉陽處父帥師伐楚以救江

公穀無以字

四年春公至自晉

夏逆婦姜于齊

不言逆女何也曰姑逆也文公之母姜氏也以父母之族而往逆也姑逆故稱婦于齊也其不言姑逆何也曰逆之道男下女也以姑下婦不可以訓故爲之內隱也何以不稱氏曰女在族稱姓不稱氏猶未離乎齊也稱女必稱姓示嫁娶不同姓也在族不稱氏女非所以承族也或曰公逆而成禮乎齊與曰公逆而成禮乎齊則言夫人不言婦也婦者姑稱之辭也非姑逆者雖言婦必曰夫人婦也

狄侵齊

秋楚人滅江

晉侯伐秦

衛侯使甯俞來聘

冬十有一月壬寅夫人風氏薨

風氏妾也何以書夫人薨曰僖公君魯三十有三年矣國君之母雖欲勿稱得乎君之路馬猶式焉况其母乎此春秋教爲臣子之道也然歸舍且賵王不稱天何也曰禮者所以緣情者也以臣子則

君之母以天王則猶臣之妾也

五年春王正月王使榮叔歸舍且賵

榮叔使不言來何也曰凡使必有副也奉命而出疾病而舍以副將命身待于境致而後復禮也且之者何曰禮有加也天子于諸侯之母有舍賵之義所以申孝子也然于庶宜有殺于嫡也隆而不殺是無等也

三月辛亥葬我小君成風

王使召伯來會葬

召穀作毛

夏公孫敖如晉

秦人入郟

秋楚人滅六

冬十月甲申許男業卒

六年春葬許僖公

夏季孫行父如陳

秋季孫行父如晉

八月乙亥晉侯驩卒

驩公作謹

趙盾以杜祁之賢欲立公子雍焉君薨苟無定嗣

將擇君而事之盾也可謂知言矣周之興也任姒之產也漢臣以駟氏之故不立齊王卒得文帝稱爲上治夫嬖邪無賢子攷之于古什得其九可以鑒也盾之廢少邇長宜乎曰否太子雖少先君之定嗣也

冬十月公子遂如晉葬晉襄公

晉殺其大夫陽處父

殺陽處父者狐射姑也何以不言晉人殺也曰執晉政者罪也襄公秋卒而靈公夏立是時也晉無

君惟趙盾執晉政矣射姑怨處父之易已也知處
 父無援于晉而殺之知盾之為已不為處父也始
 恃其好以逞克逆終介其寵以逋典刑盾雖不殺
 處父猶盾殺之也故曰晉殺以罪乎執晉政者也
 晉狐射姑出奔狄 射穀作夜
 射姑殺國大夫而逃其死晉無刑矣且使與駢送
 其帑以禮于射姑是有黨而不有國也易曰小懲
 而大誡况其大者乎殺大夫則君危殺一大夫則
 衆大夫危先克之禍趙穿之亂盾則啓之

閏月不告月猶朝于廟

七年春公伐邾三月甲戌取須句 句公作胸

遂城郟

夏四月宋公王臣卒 穀作壬臣

宋人殺其大夫

戊子晉人及秦人戰于令狐

晉先蔑奔秦 蔑公作昧奔上有以師字

狄侵我西鄙

秋八月公會諸侯晉大夫盟于扈

冬徐伐莒公孫敖如莒涖盟

涖公穀作莅

八年春王正月

夏四月

秋八月戊申天王崩

冬十月壬午公子遂會晉趙盾盟于衡雍

乙酉公子遂會雜戎盟于暴

雜上公有伊字

公孫敖如京師不至而復丙戌奔莒

公無而字

螽

宋人殺其大夫司馬宋司城來奔

九年春毛伯來求金

夫人姜氏如齊

二月叔孫得臣如京師辛丑葬襄王

晉人殺其大夫先都

三月夫人姜氏至自齊

晉人殺其大夫士穀及箕鄭父

楚人伐鄭

公子遂會晉人宋人衛人許人救鄭

夏狄侵齊

秋八月曹伯襄卒

九月癸酉地震

冬楚子使椒來聘 椒穀作菽

秦人來歸僖公成風之襚

葬曹共公

十年春王三月辛卯滅孫辰卒

夏秦伐晉

楚殺其大夫宜申

自正月不雨至于秋七月

及蘇子盟于女栗

冬狄侵宋

楚子蔡侯次于厥貉 厥公作屈

十有一年春楚子伐麋 麋公作圉

夏叔仲彭生會晉郤缺于承筐 公穀無仲字 筐公穀作匡

秋曹伯來朝

公子遂如宋

狄侵齊

冬十月甲午叔孫得臣敗狄于鹹

十有二年春王正月郕伯來奔郕公作盛

郕太子以夫鍾與郕邾來奔書曰郕伯何也蓋三邑之人奉之為君矣先君之命太子豈叛人所得廢乎苟有奉之者雖蕞爾在外名位猶正也晉元嗣號于江左祥興即位于礪州一方尊之為主四海係之為統知此義也可以正人心矣是以乾侯之公而曰公房州之帝而曰帝

杞伯來朝

二月庚子子叔姬卒

何以不書杞叔姬也曰杞伯請絕叔姬而公許之故不書杞也女嫁則從夫夫絕之父母不得制不絕也書卒則何曰夫雖絕之父母猶可勿替焉也

夏楚人圍巢

秋滕子來朝

秦伯使術來聘術公作遂

冬十有二月戊午晉人秦人戰于河曲

季孫行父帥師城諸及鄆鄆公作運後同

十有三年春王正月

夏五月壬午陳侯朔卒

邾子蘧蔭卒

自正月不雨至于秋七月

大室屋壞 大公胡作世

冬公如晉衛侯會公于沓 會下公無公字

狄侵衛

十有二月己丑公及晉侯盟

公還自晉鄭伯會公于棐 棐公作斐

十有四年春王正月公至自晉

邾人伐我南鄙叔彭生帥師伐邾

夏五月乙亥齊侯潘卒

六月公會宋公陳侯衛侯鄭伯許男曹伯晉趙盾癸

酉同盟于新城

秋七月有星孛入于北斗

公至自會

晉人納捷菑于邾弗克納 捷公作接

九月甲申公孫敖卒于齊

齊公子商人弑其君舍

宋子哀來奔

冬單伯如齊

齊人執單伯

齊人執子叔姬

十有五年春季孫行父如晉

三月宋司馬華孫來盟

夏曹伯來朝

齊人歸公孫敖之喪

六月辛丑朔日有食之鼓用牲于社

單伯至自齊

晉卻缺帥師伐蔡戊申入蔡

秋齊人侵我西鄙

季孫行父如晉

冬十有一月諸侯盟于扈

十有二月齊人來歸子叔姬

齊侯侵我西鄙遂伐曹入其郭

十有六年春季孫行父會齊侯于陽穀齊侯弗及盟

夏五月公四不視朔

六月戊辰公子遂及齊侯盟于鄆丘

公作犀丘
穀作師丘

秋八月辛未夫人姜氏薨

毀泉臺

楚人秦人巴人滅庸

冬十有一月宋人弒其君杵臼

公作處曰

十有七年春晉人衛人陳人鄭人伐宋

夏四月癸亥葬我小君聲姜

聲公作聖

齊侯伐我西鄙

六月癸未公及齊侯盟于穀

諸侯會于扈

秋公至自穀

冬公子遂如齊

十有八年春王二月丁丑公薨于臺下

秦伯營卒

夏五月戊戌齊人弒其君商人

六月癸酉葬我君文公

秋公子遂叔孫得臣如齊

冬十月子卒

春秋本義

卷五


三

夫人姜氏歸于齊

季孫行父如齊

莒弒其君庶其

春秋本義卷五



文化傳午

文化傳午

